

ARUBA TAMBE POR TIN SU MUSEO INFANTIL

ORANJESTAD (AAN) - Tin proyectonan interesante y recreativo pa mucha cu otro paisnan di nos mesun region a desaroya, cu tambe por worde introduci na Aruba, si tin e voluntad necesario di parti di gobierno pa haci e inversion requeri y si tin e colaboracion di sector priva, ya cu educacion di nos muchanan mester ta di interes di un y tur.

Famianan cu a bay cu vacacion na paisnan di Latinoamerica y algun otro isla den Caribe a observa kico un biblioteca infantil ta y un ke otro comentario a ser haci na redaccion di DIARIO ya cu esnan cu ta sali afo conoce otro culturanan ta sinti cu na Aruba tin un gran bashi cu mester yena y cu por worde yena tambe.

Den otro paisnan nan ta yame "Museo Infantil", pasobra tin hopi informacion antiguo, cu di manera recreativo, e muchanan ta haya.

E mayornan tambe ta disfruta di e sorto di sitionan asina, unda cu e bishitantenan ta paga apenas un prijs modera, destina pa mantencion di e lugar, cu tin hopi di ofrece na e cliente.

E decoracion di e biblioteca of museonan aki ta algo fantastico. Hopi creatividad ta ser inverti. Podise mas creatividad cu placa ta costa un proyecto asina.

Aruba ta un pais di hende creativo. Pero hopi bez ta sosode cu si un hende ta bini cu un idea asina, no ta falta

un hende cu kibra su moral pasobra "Aruba ta mucho chiquito", "Conociendo nos hendenan...", "Un proyecto asina, ta ken ta financie?", y otro argumentonan cu ta bini acerca y a la final e idea ta muri "di morto natural".

Aruba tin tur e posibilidad pa bin cu un museo of biblioteca infantil. Un di e entidadnan cu por duna conseho ta e Instituto Venezolano

para la Cultura y la Cooperacion, ya cu na Venezuela tin un museo fantastico, cu hopi mucha di Aruba a bishita y a keda encanta cune.

Aruba mester bira un pais hopi mas desaroya riba terreno cultural. Si ningun hende ta haci esfuerzo y ta riesga pa haci algo diferente, nada no por worde logra.